

0.0.1 mettagusuttaṃ

1053. pucchāmi taṃ bhagavā brūhi metaṃ,
 (iccāyasmā mettagu)
 maññāmi taṃ vedaguṃ bhāvitattaṃ;
 kuto nu dukkhā samudāgatā ime,
 ye keci lokasmiṃ anekarūpā.

1054. dukkhassa ve maṃ pabhavaṃ apuc-
 chasi, (mettaguti bhagavā)
 taṃ te pavakkhāmi yathā pajānaṃ;
 upadhinidānā pabhavanti dukkhā,
 ye keci lokasmiṃ anekarūpā.

1055. yo ve avidvā upadhiṃ karoti,
 punappunaṃ dukkhamupeti mando;
 tasmā hi jānaṃ upadhiṃ na kayirā,
 dukkhassa jātippabhavānupassi.

1056. yannaṃ apucchimha akittayī no, (ic-
 cāyasmāmettagu)
 aññaṃ taṃ pucchāmi tadingha brūhi;
 kathannu dhīrā vitaranti oghaṃ,
 jātijaraṃ sokapariddavañca;
 taṃ me muni sādhu viyākarohi,
 tathā hi te vidito esa dhammo.

1057. kittayissāmi te dhammaṃ, (mettaguti
 bhagavā)
 diṭṭhe dhamme anitihaṃ;

yaṃ viditvā sato caraṃ,
tare loke visattikaṃ.

1058. tañcāhaṃ abhinandāmi,
mahesi dhammamuttamaṃ;
yaṃ viditvā sato caraṃ,
tare loke visattikaṃ.

1059. yaṃ kiñci sampajānāsi, (mettaguti
bhagavā)
uddhaṃ adho tiriyañcāpi majjhe;
etesu nandiñca nivesanañca,
panujja viññāṇaṃ bhava na tiṭṭhe.

1060. evaṃvihāri sato appamatto,
bhikkhu caraṃ hitvā mamāyitāni;
jātiṃ jaraṃ sokapariddavañca,
idheva vidvā pajaheyya dukkhaṃ.

1061. etāhinandāmi vaco mahesino, (iccā-
yasmā mettagu)
sukittitaṃ gotama nupadhikaṃ;
addhā hi bhagavā pahāsi dukkhaṃ,
tathā hi te vidito esa dhammo.

1062. te cāpi nūna pajaheyyu dukkhaṃ,
ye tvaṃ muni aṭṭhitaṃ ovadeyya;
taṃ taṃ namassāmi samecca nāga,
appeva maṃ bhagavā aṭṭhitaṃ ovadeyya.

1063. yaṃ brāhmaṇaṃ vedaguṃ ābhijaññā,
 (mettaguti bhagavā)
 akiñcanaṃ kāmabhava asattaṃ;
 addhā hi so oghamimaṃ atāri,
 tiṇṇo ca pāraṃ akhilo akaṅkho.

1064. vidvā ca so vedagu naro idha,
 bhavābhave saṅgamimaṃ visajja;
 so vitataṇho anigho nirāso,
 atāri so jāti jaranti brūmiti.